

Voltade la seconde app di messaçs plui doprade tal mont

La lenghe furlane e je su Telegram

La lenghe furlane e je rivade su Telegram. O fevelin de seconde app pai messaçs plui doprade tal mont, cun passe 400 milions di utents atîfs ogni mès, discjamade simpri di plui pes sôs carateristichis di praticitât e di riservatece (lis informazions sui utents no vegnin dadis fûr a tierçs). Cun di fat, un fenomen planetari, là che cumò ancje il furlan al è protagonist.

La idee di rindi disponibile la interface de plateforme ancje par furlan e je di une clape di volontaris apassionâts - Diego Della Rossa, Astrid Virili, Fulvio Romanin, coordinâts di Martino Buchini - che a àn cjatât, pe prime volte in Italie, une poie istituzionâl, ven a stâi la colaborazion de Region Autonome Friûl - Vignesie Julie midiant de ARLeF.

La Agenzie Regionâl pe Lenghe Furlane e à di fat furnît un supuart linguistic professionâl: in graciis di un lavôr lunc e atent, a son stadis voltadis par furlan, daûr de grafie uficiâl, plui di 15.000 stringhis dai sistemis operatîfs dulà che si pues doprâ la app: Android, iOS, TDesktop, MacOS e Android X. «Ancje in cheste ocasion o vin la



conferme che pal furlan, compagn che par dutis chês altris lenghis dal mont, no je sierade nissune strade de comunicazion - al à vût dit Eros Cisilino, president de ARLeF -. Nancje chês che a disfrutin i struments plui modernis, che a àn ancje il vantaç di jessi dopradis ogni dì di dutis lis fassis di utents e, in particolar, dai zovins. Al è a lôr che ancje cheste volte la Agenzie e indrece la sô atenzion operative preferenziâl, stant che a presein e ur dan valôr a chescj struments, che a son une vore utii par accessi la cognossince de lenghe

furlane, ancje cul doprâju ogni dì». Il prossim obietîf al è il ricognossiment uficiâl de lenghe furlane di bande di Telegram, che al permetarà di selezionâle tal menù des lenghis predefinidis che si cjate te aplicazion. La procedure e je za stade inviade cu la poie convinte de Region F-VJ, che midiant de ARLeF si è impegnade ancje tal inzornament costant de plateforme. Intant, si pues za ativâ la interface in marilenghe: al baste discjamâ la app e clicâ su chest leam <https://t.me/setlanguage/furlan->

ARLeF e UNIUD pe certificazion linguistiche

La ARLeF e la Universitât dal Friûl a àn firmât un document di colaborazion cul obietîf di preparâ lis personis che a vuelin otignî la certificazion linguistiche pe lenghe furlane. L'acuardi al durarà dal 2020 al 2022 e al podarà jessi rinovât par altris trê agns. La ARLeF e à metût a disposizion un finanziament di 65 mil euros: i doi ents a lavoraran adun inte organizazion di cors di formazion e di inzornament, e pe realizazion di tescj e di struments didactics. In particolar, si vuelin prontâ provis di plaçament/aciertament par nivei, di fâ in linie, e une bancje di dàts cun exercizis e percors didactics che a compagnin lis candidadis e i candidâts intal otigniment de certificazion. Inte suaze dal acuardi, l'Ateneu furlan si ocuparà dal coordinament

sientific, amministratîf, organizatîf e gjestionâl; la ARLeF invezit, midiant des sôs competencis linguistiche, e colaborarà pe realizazion des iniziativais previodudis e e curarà ancje lis ativitâts di promozion, informazion e comunicazion.

«Otignî la certificazion linguistiche al è un risultât impuartant intal percors formatîf di ducj - al à marcât il president de ARLeF, Eros Cisilino -. Intal mont dal lavôr chest document al ufrîs, di fat, une garanzie des competencis che e jude l'incuintri tra la domande e la ufierte in ambits professionâi là che la cognossince dal furlan e je pardabon un valôr zontât, tant che par esempli intal cumierç, intai servizis ae persone e intal setôr de salut. Cun cheste gnove colaborazion si fâs un pas indenant



Di çampe: il retôr de Universitât dal Friûl, Roberto Pinton; il president de ARLeF, Eros Cisilino e Enrico Peterlunger, president dal CIRF

fondamentâl su chel troi che al puatarà insegnants, amministrazion publice ma ancje citadins privâts, a otignî la certificazion linguistiche pe lenghe furlane, che par altri e je previodude de L.R. 29/2007».